

# ՀՀ Արմավիրի մարզպետ Համբարձում Մաթևոսյանի շնորհավորանքի խոսքը՝ Բուժաշխատողների օրվա կապակցությամբ

21.06.2020

*Հարգելի բուժաշխատողներ, բժշկի կոչումը մեծ պատվով կրող սիրելի գործընկերներ,*

Լավագույն ցանկություններով շնորհավորում եմ բոլորիդ մասնագիտական տոնի՝ Բուժաշխատողի օրվա առթիվ:

Նախ ցանկանում եմ երախտիքի խոսք հղել մեր բժիշկներին, բուժքույրերին ու ոլորտի այն բոլոր աշխատակիցներին, ովքեր բարձր պատասխանատվությամբ և անմնացորդ նվիրումով գիշերուզօր պայքարում են համաշխարհային այս մարտահրավերի՝ COVID-19-ի դեմ: Ինչ խոսք, այս անհավասար պայքարում ձեզ հաջողվում է մեծաթիվ կյանքեր փրկել, իսկ երբեմն էլ, ուղղակի, անզոր գտնվել այդ համամարդկային չարիքին դիմագրավելու հարցում:

Այո, դուք ձեր առաքելությունն իրականացնում եք Հիպոկրատի երդմանը հավատարիմ՝ ձեր խղճի համաձայն, ուժերի ներածին չափով բժշկելով հիվանդներին, երբեմն էլ երկրորդ կյանք պարգևելով նրանց: Շնորհակալություն ձեզ, արարչագործ մարդիկ: Թող ձեր սերն ու նվիրումը միշտ փոխադարձվի՝ նոր ու դրական լիցքեր և մեծ ուժ հաղորդելով ձեզ:

Ոլորտի հարգելի գործընկերներ, հավատացած եղեք, որ մարզպետարանն իր լիազորությունների շրջանակում անում է հնարավորը՝ մարզային ենթակայության բուժհաստատությունների շենքային պայմանները բարելավելու, դրանք նորագույն սարքավորումներով համալրելու, ինչպես նաև բուժանձնակազմի մասնագիտական պատրաստվածությունը և ազգաբնակչության սպասարկման որակը բարձրացնելու ուղղությամբ:

Եվ ես վստահ եմ, որ շատ շուտով մենք կունենանք ամբողջությամբ բարեփոխված և բոլոր առումներով մրցունակ առողջապահական համակարգ, որտեղ սիրով իրենց մասնագիտական պարտքը կմատուցեն մեր բուժաշխատողները և լավագույն բուժօգնություն կստանան մեր բնակիչները:

Հարգարժան բժիշկներ, կրկին շնորհավորելով ձեզ մասնագիտական տոնի առթիվ՝ բոլորիդ ցանկանում եմ ամուր առողջություն, անկոտրում կամք, անձնական երջանկություն և բազում հաջողություններ ձեր պատասխանատու աշխատանքում:

**Հարգանքով՝  
Համբարձում Մաթևոսյան**